

覓蜆仔 黃啟晉

識聽老一輩個人講，頭擺無麼个工廠，畜豬畜鴨个人家也無盡多，多得一兩隻，故所該下个圳水都盡清淨。佢等還細个時節，就蓋輒去河壩扭魚仔、覓蜆仔。毋管大圳、細圳，管佢水會深會淺，大家看到清淨个水，衫褲一脫就趕緊跳下去，反正都係細俵仔，無麼个好壞勢欸！故所佢等還細時，毋係在田坵，就係在河壩圳溝寮過，無電視電腦个時代，顛倒過欸盡幸福。

後來社會發達，工廠起欸越來越多，再加上農家人也盡有錢，畜个豬仔同鴨仔也變多，該兜有毒个水同屎尿就排到圳溝壅肚，清水變成烏疏疏个屙糟水，魚仔變少欸，蜆仔自然也毋見核。故所老人家講个頭擺事，佢等仰會相信呢！毋過，就在佢小學五年生个時節，阿姆帶等佢等去一條圳溝覓蜆仔，佢正相信老人家講个係真識欸！

哪片還有恁清淨个圳溝呢？原來在麟洛莊个田心仔，接近這下屏東監獄个後背（該下監獄正在起），有一條小圳溝。因為吾大姨係在地人，該條圳溝堵好在吾大姨个羊寮後背，故所佢就帶佢等去到該覓蜆仔。該圳溝水蓋淺，毋過愛下到該嘎無簡單，因為圳溝脣係斜斜个草地，頂項全係會刺人个蝦公夾，愛定定欸跋到底下，一無細義就會分厥刺仔刺到，該斯會痛到喊阿姆。毋過為著覓蜆仔，佢等哪有在驚呢！反正著長褲，就定定欸跋下起耶！無想到該刺仔實在太刺人欸，刺到佢等个褲裡背，雖然嘴角緊喊痛，心情也係盡暢樂，哪有在驚佢，還係繼續跋，最尾總算跋到圳溝肚，趕緊同褲腳擲項來蹬水。該腳蹬著冷

淨个水，實在透心涼；再看著水裡背个蜆仔，一隻隻堵堵好開殼，露出白瀉瀉个身體在噴砂，大家人个兩隻手既經等毋掣个伸到水裡背拈蜆仔，吾老弟阿清拿起撈仔，想愛一擺就同全部个蜆仔撈起來，嘎撈著一大堆个沙仔，實在好噏唷！這圳溝實在有清淨，有時還會感覺著魚仔從佢等个兩隻細腳髒泅過去，係無就係恬下來親佢等个腳趾頭，搵到佢等又癢又刺。佢一粒一粒同蜆仔扭到盆仔項，看頓這兜蜆仔，心肚欸想今暗晡阿母就有煮味个材料欸，毋斯煩惱愛煮麼个味。該日下晝，大家人暢樂个浸在圳溝項，日花仔照等每一個人，實在分人難忘。佢等一直到臨暗月光出來，正毋盼得个歸去屋下。

該擺過後，佢等就盡少再去到該，監獄也起好欸！等到佢國三个時節，有一擺同阿哥騎等腳踏車經過該片，看著个都係監獄仔一扇扇恁高个牆頭，清淨个小圳仔既經看毋到蜆仔，連細魚仔也盡難看著，分人蓋感慨。這下恁起還細時，佢等細人仔共下覓蜆仔搞寮个事，還會自然个噏出來。希望環境有轉好个一日，分這兜小魚仔同蜆仔歸到佢等个所在，佢定著會帶著佢个俵仔，共下浸在這清淨个田坵圳溝，暢樂个來覓蜆仔、撈魚仔，享受一個真識暢樂个童年。

~~ 作者為屏東縣育英國小教師 ~~